

淳化县志

一
函
四
冊
函

淳化縣志卷二十六

知縣事南州萬廷樹重纂

詞賦略第十七

漢

甘泉頌

王褒

漢書王褒傳元帝爲太子喜褒所爲洞簫賦及甘泉頌 文
選魏都賦注引王褒甘泉頌 西京賦注引王褒甘泉頌曰
編璫瑁之文攬

引王褒甘泉頌甘泉山天下顯敞

之處也前接大荆後臨北極左撫仁鄉右望素域其宮室也
鏤螭龍而造牖采雲氣以爲楣神星羅於題鄂虹蜺往往而

繞榱想聖主之優游時娛神而款縱坐鳳凰之堂聽和鸞之
弄臨麒麟之域驗符瑞之貢詠中和之歌讀太平之頌

甘泉宮賦

揚雄

孝成帝時客有薦雄文似相如者上方郊祠甘泉泰畤汾陰
后土以求繼嗣召雄待詔承明之庭正月從上甘泉還奏甘
泉賦以風其辭曰惟漢十世將郊上立定泰畤雍神休尊明
號同符三皇錄功五帝卹胤錫羨拓迹開統於是迺命羣僚
歷吉日協靈辰星陳而天行詔招搖與泰陰兮伏鉤陳使當
兵屬堪輿以壁壘兮梢夔魑而扶獠狂八神奔而警蹕兮振
殷鑠而軍裝蚩尤之倫帶干將而秉玉戚兮飛蒙茸而走陸

梁齊總總以擢擢其相膠葛兮焱駭雲訊奮以方攘駢羅列
布鱗以雜沓兮柴虎參差魚頡而鳥旴翕赫矧霍霧集而蒙
合兮半散照爛粲以成章於是乘輿迺登夫鳳凰兮而翳華
芝駟蒼螭兮六素蚪螭略蕤綏灑庠祲纚帥爾陰閉雪然陽
開騰清霄而軼浮景兮夫何旗旄郅偁之旖旎也流星旄以
電燭兮咸翠蓋而鸞旗敦萬騎於中營兮方玉車之千乘聲
駢隱以陸離兮輕先疾雷而馭遺風陵高衍之嶮巖兮超紆
譎之清澄登椽欒而狃天門兮馳閭闔而入凌兢是時未轅
夫甘泉也迺望通天之繹繹下陰潛以慘廩兮上洪紛而相
錯直嶢嶢以造天兮厥高慶而不可虜彌度平原唐其壇曼

兮列新雉於林薄摺并閭與茆苫兮紛被麗其亡鄂崇邱陵
之駸駸兮深溝欽巖而爲谷逞逞離宮般以相燭兮封巒石
關施靡康延屬於是大廈雲譎波詭摧曜而成觀仰擣首以
高視兮目冥眴而亡見正瀏濫以宏恔兮指東西之漫漫徒
回回以徨徨兮魂固眇眇而昏亂據軫軒而周流兮忽軼軋
而亡垠翠玉樹之青蔥兮壁馬犀之璘璫金人仡仡其承鍾
虞兮嵌巖巖其龍鱗楊光曜之燎燭兮垂景炎之炘炘配帝
居之縣圃兮象泰壹之威神洪臺掘其獨出兮擻北極之嶠
嶠列宿迺施於上榮兮日月纔經於枳振雷鬱律而巖突兮
電倏忽於牆藩鬼魅不能自逮兮半長途而下顛厯倒景而

絕飛梁兮浮蟻蠓而撇天左櫓槍而右玄冥兮前燁闕而後
應門蔭四海與幽都兮涌醴汨以生川蛟龍連蜷於東厓兮
白虎敦圉庠昆侖覽樛流於高光兮溶方皇於西清前殿崔
巍兮和氏瓏玲炕浮柱之飛榱兮神莫莫而扶傾閶闔其
廖廓兮似紫宮之崢嶸駢交錯而曼衍兮峻嶂隗廋其相嬰
乘雲閣而上下兮紛蒙籠以棍成曳紅采之流離兮颺翠氣
之宛延襲琤室與傾宮兮若登高眇遠亡國肅庠臨淵回焱
肆其碭駭兮玃桂椒而鬱移楊香芬薈以窮隆兮擊薄櫪而
將榮薌咲肸以棍批兮聲駢隱而厯鍾排玉戶而颺金鋪兮
發蘭蕙與翦翦帷弼張其拂汨兮稍暗暗而靚深陰陽清濁

穆羽相和兮若夔牙之調琴般倕棄其剗剗兮王繭投其鉤
繩雖方征僑與偓佺兮猶彷彿其若夢於是事變物化目駭
耳回蓋天子穆然珍臺間館琬題玉英蝸蛸蠓濩之中惟夫
所以澄心清魂儲精垂恩感動天地逆釐三神者迺搜述索
偶臯伊之徒冠倫魁能函甘棠之惠挾東征之意相與齊乎
陽靈之宮靡辟荔而爲席兮折瓊枝以爲芳吸清雲之流瑕
兮飲若木之露英集乎禮神之囿登乎頌祇之堂建光耀之
長旂兮昭華覆之威威攀琬璣而下視兮行遊目乎三危陳
衆車於東阬兮肆玉軼而下馳漂龍淵而還九垓兮窺地底
而上回風澌澌而扶轄兮鸞鳳紛其銜蕤梁弱水之澨澨兮

躡不周之透蛇想西王母欣然而上壽兮屏玉女而却宓妃
玉女亡所眺其清矚兮宓妃曾不得施其蛾眉方攬道德之
精剛兮侔神明與之爲資於是欽柴宗祈燎薰皇天臯搖泰
一舉洪頤樹靈旗樵蒸昆上配黎四施東燭滄海西耀流沙
北燠幽都南煬丹厓玄瓚鯀膠秬鬯泔淡盼饗豐融懿懿芬
芬炎威黃龍兮燦訛碩麟選巫咸兮叫帝闔開天廷兮延羣
神儼暗藹兮降清壇瑞穰穰兮委如山於是事畢功宏迴車
而歸度三巒兮偈棠黎天闔決兮地垠開八荒協兮萬國諧
登長平兮雷鼓礚天聲起兮勇士厲雲飛揚兮雨滂沛于胥
德兮麗萬世亂曰崇崇園邱隆隱天兮登降列施單墀垣兮

增宮參差駢嵯峨兮嶸嶸嶙峋洞無厓兮上天之緯杳旭卉
兮聖皇穆穆信厥對兮徠祗郊禋神所依兮徘徊招搖靈迟
遲兮光輝眩耀降厥福兮子子孫孫長無極兮

甘泉本因秦離宮制既奢泰而武帝復增通天高光迎風
宮外近則洪崖旁皇儲胥弩陟遠則石關封巒枝鵲露寒
棠梨師得遊觀屈奇瑰瑋非他宮比夫木摩而不彫牆塗
而不畫周宣所考盤庚所遷夏卑宮室唐虞採椽三代之
制也漢宮增飾不類上古但其爲已久矣非成帝所造欲
諫則非時欲默則不能已故遂推而隆之迺上比於帝室
紫宮若曰此非人力之所能倘鬼神可也又是時趙昭儀

方大幸母上甘泉常法從在屬車閒豹尾中故雄聊盛言
車騎之衆參麗之駕非所以感動天地逆釐三神又言屏
玉女卻慮妃以微戒齊肅之事賦成奏之天子異焉

梁

經通天臺奏漢武帝表

沈炯

臣聞橋山雖掩鼎湖之竈可祠有魯遂荒大庭之跡無泯伏
惟陛下降德猗蘭纂靈豐谷漢道旣登神仙可望射之罍於
海浦禮日觀而稱功橫中流於汾河指柏梁而高宴何其甚
樂豈不然與旣而運屬山仙道窮宴駕甲帳珠簾一朝零落
茂陵玉盃遂出人間雲陵故基與原田而隳隳扶風餘址帶

陵阜而芒芒羈旅綫臣豈不落淚昔承明見獻嚴助東歸駟
馬可棄長卿西反恭聞故實竊有愚心黍稷非馨敢望徼福
但雀臺之弔空愴魏君雍邱之祠未光秦后瞻仰標霞伏增
悽戀

宋

甘泉宮記

唐仲友

漢有區夏作都長安封畿之內宮館環列蓋數十百所天子
以時講事鑾輿行幸各有攸處而文物之盛莫如甘泉蓋自
孝文迄於元成嘗於此整軍經武祀神考政行慶賞朝會之
禮非止爲清署也其珍臺間館增飾崇麗極屈奇瑰偉之觀

非它宮比當時鴻儒碩生若相如枚臯王褒揚雄之儔從屬
車之清塵預觀盛典類能持簡操筆揚厲偉蹟故讚功論德
則有子淵之頌主文譎諫則有子雲之賦辭意旣盛美矣獨
未聞登載本末勒諸金石非闕文歟謹追述而記之曰璇穹
垂象躔次彪列營室之東離宮辨位王良之南閣道循軌王
者憲天御極肇建宸居必有增宮別館以備臨幸夫豈事奢
泰以侈遊觀哉蓋將隆上都規億載非壯麗亡以重威不軌
物何以示訓是以夏都冀方敝有鈞臺之饗周宅鎬京康有
鄠宮之朝考室之制其來尙矣粵茲靈宮奠居乾維昔帝鴻
氏於此接萬靈際上帝是謂明廷天嘗假力于秦以營宮室

是謂林光漢曰甘泉蓋因山以更命之也爰自孝文實始巡
幸命將撫師克固吾圉稽古禮文我則未暇泊我孝武重熙
累治迺詔共工繼治增益元朔之初則作臺室以畫鬼神元
鼎之間則立泰畤以展郊拜延壽通天前殿諸侯王邸又剏
於元封太初之際故其繚牆之內宮館相望近則洪崖旁皇
儲胥胥陸遠則石關封巒鳥鵲露寒高光迎風起於中棠梨
師得接於外光明神麗迤靡連屬紫宮元圃之居不是過也
始元朔迄于後元法駕清澤相繼戾止蒐講墜典靡不在焉
受計者一郊泰畤者三朝諸侯王者再外國之客饗於是汾
陰之鼎藏於是祀神君賜宗室東封北巡發軔弭節周旋于

茲號令文章煥焉可述矣孝宣中興復修故事蓋嘗卽此四
拜泰一再朝呼韓功烈茂盛增光祖宗降及元成猶遵遺業
執珪幣以事上帝凡九至焉茲禮樂之所自出德業之所由
著豈與長楊五柞爲校獵之地黃陽宣曲置更衣之所窮奢
極欲以快心目者同日道哉武宣之世上天降鑒眷顧與宅
靈芝產齊房黃雲覆寶鼎路弓獲鹿於中山美光兆祥於泰
時神爵五采萬數翔集神光並見燭耀齊宮滋至之休著於
茲宮者史不絕書矣成帝之初丞相御史議罷泰時則天出
警戒風毀作宮暨帝復行薦饗則仍有神光降集紫殿得非
斯宮之作克厭帝心哉雖然廡祈築而謗興靈臺作而民附

宮室建之禍福之階也則夫垂衣拱手螭螭蠖蠖之中不可
思乎是故飭躬齊精必念夫逆釐三神負戾聽斷必念夫施
澤四海四夷君長俯伏渭橋必思夫威德之所加冠裳玉帛
羣后咸在必思夫恩禮之所浹神祇降嘏則抑畏自度天戒
垂示則恐懼修省夫然故事無過舉方外蒙福宮室之奉可
安享也苟不思政事而樂逸游不修典禮而懷宴安則厥鑒
不遠在秦皇之世居是宮者甚可畏哉若乃玉樹馬犀金人
鍾虓之屬子雲已能賦之至於日磾之母圖於宮中昭儀之
寵麗於法從衛尉之罷置郊時之因革皆不係於作宮之旨
班史具在茲不復書

淳化縣志卷二十七

知縣事南州萬廷樹重纂

詞賦略第十七

宋

涇渠總論

宋敏求

涇水出安定郡峽頭山西自平涼界來經邠州新平淳化二縣入乾州永壽縣界千有餘里皆在高地東至仲山谷乃移平壤畧以於此可以疏鑿以溉五縣之地夫五縣未鑿渠之前皆斥鹵磽确不可以稼自被浸灌遂爲沃野至今千餘年民賴其利但渠初鑿時渠與河平勢無齟齬歲月湫滌河低

渠高遂不可用雖白公趙佗繼之於後終亦不久者蓋仲山
洪口萬嶺環複兩崖劃斷河流湧出勢如建瓴復阻石堰其
怒愈甚土石承委不得不崩今其下有小龍潭其深不測是
水激射而成也河既漸下渠岸自高所溉之田日復淤閉雖
強壅遏更無良策今新石渠已迫山足又高三四尺矣苟不
可行千載之功誠爲可惜抑嘗考經形勢人有生長其處耳
日習熟猶或不知韓人鄭國一入敵境何遽識此而開萬世
之利不亦神乎雖然利之所在害必從之今五縣之民歲八
月治堰九月畢工截石伐木掘泥懸土入水直圉下臨不測
十月引水以嗣來歲入秋始罷又復就役寒暑晝夜不得少